



Er ils autos da «putsch» n'èn mai stads en funcziun – els eran mess si per inaugurar in nov center da cumpras.

FOTOS SABRINA BUNDI



Sut il sarcofag è il coc da l'ovra atomara.

FOTOS SABRINA BUNDI, RTR

# Tschernobyl – in viadi tras ina citad morta

## Rapport dad ina tura en la zona da la catastrofa atomara

SABRINA BUNDI/RTR

■ **Ier avant 35 onns è capitada la gronda catastrofa atomara da Tschernobyl en Ucraina. Ozendi pon ins far turas turisticas tras il territori da Tschernobyl. Sabrina Bundi, redactura tar RTR, ha fatg dacurt ina da quelas turas – ed ella rapporta.** La tura cumenza a Kiev. En gruppas pitschnas da 10 enfin 15 persunas pon ins ir cun in pitschen bus en direenziun Tschernobyl. En mia gruppa hai jau persunas da l'entir mund, dal Canada, il Portugal, l'Italia. In dals emprims stops è in pitschen vitg ordaifer da Prypjat, la gronda citad dasper l'ovra atomara ch'è explodida il 1986. Dentant il vitg na ves'ins strusch – tut è creschì en, las chasas èn be pli ruinas demolidas, cuvertas da pulvra, stgaglias e feglia. La mobiglia da lain ch'è pli greva da decontaminar è savens vegnida chavada en la terra. Tuttina pon ins observar, che las persunas han stuì bandunar immediat lur dachasa – en ina chasa èn per exempel anc sin maisa ils pensums da scola d'ina buoba.

### Prypjat – ina metropola morta

In stop pli lung fan ins er a Prypjat sez, la citad nua che blers lavurants da l'ovra atomara abitavan. La guida *Irina* infurmescha: Prypjat saja stada ina citad top-moderna: grondiusa scolaziun, ina scienza innovativa ... gea, schizunt bananas pudevan ins cumprar qua en stizun. Quai na devi nagliur auter en l'Ucraina, da quel temp anc part da l'Uniun sovietica. Er la citad da Prypjat è ussa be pli in skelet: bajetgs vids, demolids e creschids

en. I dat er blers maletgs enconuschents, per exempel quel d'ina roda gigantesca totalmain da ruina. La roda n'è mai stada en funcziun, la notg avant l'inauguraziun è l'ovra atomara explodida.

### Manaivel al «sarcofag»

Ina da las staziuns da la tura maina er vaira datiers da l'ovra atomara sco tala. Il radiometer stat dentant relativmain ruasavel, forsa perquai ch'il coc nuclear è sut dus mantels dad atschal e betun – ils

uschenumnads «sarcofags». Il segund duai tegnair per ils proxims 100 onns.

Restar in ubain dus dis en questa zona da la catastrofa n'è oz betg pli privlus u nuschaivel. Nossa guida Irina di che nus hajan probablmain gi dapli radiazion da sgular cun l'eroplan a Kiev che da restar in di en il territori.

### Anc adina zonas privlusas

Dentant datti tuttina anc lieus ch'èn scumandads da passar, senza mesiras da protecziun. Per exempel l'ospital a Prypjat. En quel avevan ins purtà ils pompieri ch'han sco emprims suenter l'explosiun stizzà il ficu en l'ovra atomara. Lur uniformas avevan ins bittà en il tschaler – e quellas èn anc adina uschè radioactivas, ch'ins na po betg entrar en l'ospital.

In auter exempel è il «red forest», il guaud cotschen. Qua passan ins be spert tras cun il bus, ed il radiometer tschivla tuttenina bler pli spert cun ir tras il guaud. Il num guaud cotschen ha el, perquai che tut las guglias da las plantas èn curt suenter l'explosiun vegnidas cotschnas. Anc oz è il guaud serrà.

## La catastrofa dal 1986

(fmr) Ils 26 d'avrigl 1986 hai dà en il bloc 4 da l'ovra atomara Tschernobyl en l'Ucraina il pli grond accident en l'istorgia da l'energia nucleara. La culpa èn stads gronds mancos en la construcziun dal reatur ed era ina cultura da segirtad fitg manglusa. Tras l'explosiun dal reatur è sa deliberada ina radioactivitad da plirs trilliuns «Becquerel» en l'atmosfera. Quella è sa derasada cun plievgia e vent en la regiun dal nordost da Tschernobyl, ma era sur plirs pajais en Europa.

Suenter la catastrofa è la regiun vegnida decontaminada uschè bain sco pussavel ed il reatur è vegnì suglià dad in grond «sarcofag». En consequenza directa da la catastrofa èn mortas radund 4000 persunas. Radund 350 000 persunas han stuì bandunar la zona da la catastrofa nucleara.